


Na caminda pa un maneho cultural

Museo y monumentonan parti di ruta cultural



ORANJESTAD (AAN): E siman aki na e casnan Ecury y Henriquez na Schelpstraat, Minister di Cultura, Ramon Lee a reuni pa pone su mes na altura di e situacion einan, y

intercambia cu diferente experto riba su ideanan pa un plan di maneho integral pa cultura. Minister Lee ta dedica hopi atencion riba aspectonan cultural di pais



Aruba y ta kere cu cultura mester ta central den cualkier desaroyo na Aruba.

Desde cu a anuncia e plan pa reorganiza mercado di fruta na waf chikito y Minister di Cultura a propone pa converti esaki den e punto di salida pa un ruta cultural, por sinti tur caminda e entusiasmo grandi cu tin pa nos cultura. Awor Minister Lee kier, pa ademas di e plaza cultural y e casita geel na Weststraat, e otro monumentonan tambe worde integra den su maneho pa cultura. Pa duna su vision un base mas amplio Minister Lee bishita e compleho di casnan aki na Schelpstraat hunto cu expertonan di Instituto di Cultura, Monumentenbureau, Domeinbeheer y Departamento di Asuntonan Economico. Di Instituto di Cultura, director Frank Croes, Arqueologo Raymond Dijkhoff y Geologo Arminda Ruiz a duna un explicacion di un plan completo pa Museo Arqueologico establece y opera for di e monumento ei. Nan a presenta, nan idea, deseonan y plannan, cla pa realisa esaki riba un corto plazo. Hunto cu e otro departamentonan Minister Lee a haya un mihor comprendemento di e situacion y tambe a duna su vision pa cu e monumentonan, museo y ciudad di Oranjestad. Tin un corcondancia y un entusiasmo pa realisa e vision aki, unda cada instancia lo haci nan parti.

Minister Lee ta mira e rol cardinal di su ministerio pa duna atencion na tur aspecto di nos cultura y integra esakinan den un maneho total cu tin un balor educativo pa comunidad unda cultura lo ta un factor central den tur desaroyo. Entre otro, e plan di e ruta cultural, lo duna un aporte mas grandi na desaroyo total di Oranjestad, mientras cu publico alavez por siña mas di nos propio cultura. Den esaki, por ejemplo, Museo Arqueologico y



Instituto di Cultura, por hunga un rol hopi grandi, trahando den cooperacion estrecho cu otro departamento, manera Aruba Tourism Authority, D.O.W. etc.

Den e plan di maneho pa cultura di Minister Lee, cultura en principio ta defini como un totalidad di tur as-

pecto di nos manera di biba na Aruba, expresando asina nos identidad colectivo como pais. Pa e motibo aki, ta necesario pa tur hende, tur instancia duna nan aporte pa engrandese nos cultura y duna expresion na nos identidad.